




STEPHANIE PILICK / EPA

Edmund Stoiber —ezkerrean— eta Gerhard Schroeder kantzilerra, igande gauean, telebistan izaniko eztabaida saioan.

Kanpainako iragarki luzeena

ALEMANIAKO HAUTESKUNDEAK. Gerhard Schroeder kantzilerrak eta Edmund Stoiber kontserbadoreak igandean telebistan eginiko eztabaida saioan ez zen garaile argirik izan

Martin Beck | BERLIN

Igande gauean egin zen lehen aldiz Alemaniako bizen historian kantziler baten eta haren aurkariaren arteko eztabaida telebistan. Espero zenaz bestela, agerraldian hobeago jardun zuen Edmund Stoiber CSU Batasun Sozial Kristauko buruak Gerhard Schroeder kantzilerrak baino (SPD Alderdi Sozialdemokrata). 79 minutuko saioa izan zen, zuzean; kanpaina hasierako iragarki luzeena. Norgehiagokaren emaitza argirik ez dago: Infratest/dimap eta Forsa ikerketa erakundeek eginiko galdeketen arabera, Gerhard Schroeder izan zen garailea. Forschungsgruppe Wahlen institutuaren inkestan, aldiz, Stoiber nagusitu zen.

Irailaren 22an izango diren hauteskundeaz azken hilabeteotan egin diren galdeketa guztietan aurrea hartu dio Alemaniako eskuinak Schroederren alderdiari. SPDko sozialdemokraten eta Berdeen arteko koalizio gobernuak segituko duenik ia inork ere ez du sinesten egun Alemanian. Hori dela eta, telebistako saioak berebiziko garrantzia zuen Schroederrentzat. Kantzilerra hedabideekin oso ondo jokatzeko dakien politikaria da, eta emaitza onak ateratzen ditu hortik. Gainera, Elba eta Donau ibaietako uholdeek eragindako krisialdian kaltetuei

estatuaren laguntza bermatzeko izan duen erreazio azkarrak bere izen ona handitu du: SPDk puntu batzuk irabazi ditu oraingo inkestetan, eta CDU-CSU Batasuna aurkari kontserbadoreak ateratzen zion aldea dezente murriztu du. Garapen hau azkar zitekeen hautagai sozialdemokrata bete-betean kanpainan sartzean. Horixe espero zuen, behintzat, SPDk.

Bavariako lehen ministro Stoiber oso ondo aholkatuta joan zen eztabaida saiora, baina. Bere laguntzaile taldeak ederto prestatu zuen. Bere aurrekoa baino modu hobean aritu zen, erasokorrago. Alemaniako kantzilerrak, berriz, umore txarrean jardun zuen, ez zen eroso ibili. Batasuneko hautagaia ondo moldatu zen, bat baino gehiago harritzeko moduan. Berarengandik hainbeste espero ez zelako gertatu zen hori, ikusle askoren arabera.

Eztabaida saioan, zeinean ez zen eraso pertsonalik izan, arlo garrantzitsuenetan porrot egitea egotzi zioten elkarri bi aurkariak. Uholdeen hondamendiaren ondorioez eta lan eta zergen politikei buruz mintzatu ziren gehien. Hauteskundeon ondoren izan litekeen koalizio gobernuaz ere galdetu zitzaizen, eta desberdin erantzuten zuten biek. CDU-CSUko hautagaiak ez du «inondik inora ere» SPDrekin koalizio bat osatuko. Schroederrek, aldiz, soilik PDS

STOIBER

CSUko burua oso ondo prestatuta joan zen saiora; bere aurrekoak baino erasokorrago jardun zuen

Sozialismo Demokratikoaren Alderdia baztertu zuen. Legebiltzarrean ordezkaturik daudden gainerako alderdiak «gai» dira gobernuan jarduteko. Hala ere, berak bereak eta bost egingo ditu koalizio gorri-berdeak jarraipena izan dezan.

Zergen auzia eztabaidagai

Hauteskundeak baino lau aste lehenago Stoiberrek eskertu egin zion Schroederrei eta haren taldeari urek hartutako eskualdeetan egindako guztia. «Helburuarekin bat gatoz guztiok», nabarmendu zuen CSUko politikariak. Hondamendiak eragindako kalteei aurre egiteko finantzabideak zein izan behar diren eta nola lortu behar diren, hortxe izan ziren ezadostasunak. Zerga erreformaren bigarren fasea atzeratzea «erabaki zuzena» izango dela esan zuen Schroederrek. Stoiberren arabera, aldiz, «akatsa» izango da zergak «egoera koiuntural izugarri txarrean» ez jaistea.

Stoiberrek behin eta berriro eraso zion Schroederri kantzilerraren zerga eta lan politiken-

gatik. Haren iritziz, langabe kopuru handiaren erruduna da SPDko burua, eta hori da koalizio gorri-berdearen huts handienetakoa. Schroederrek ukatu egin zituen akusazioak, eta arrazoiak, lehen arlo batean behintzat, Alemanian ez daudela esan zuen, mundu mailako ekonomiaren garapenean baikik. Zergei buruz ere gogor eztabaidatu zuten biek. Stoiberrek akats larriak egin izana egotzi zion Schroederri. «Herriarrak duela lau urte baino okerrago daude», esan zuen. Hori «astakeria» zela erantzun zuen kantzilerrak.

Ezadostasunak Iraki buruz

Igandean Schroederrek berriro baztertu zuen soldadu alemaniarrek AEBetako militarrekin batera Iraken kontrako operazioan parte hartzea. Halako eraso batek arriskuan jarriko luke, bere iritziz, *terrorismoaren* kontrako aliantza. Bere agintaldian Iraken kontrako kanpaina Alemaniaren laguntzarekin ez dela egingo adierazi zuen.

Stoiberren ustez, «arduragabekeria» da hori, «ahuldu egingo baita» Irakeko presidente Saddam Husseinen kontrako presioa. Soldadu alemaniarrek Irakera igortzeko prest bazegoen galdetuta, hori, premiazkoa izanez gero, «lehenik» aliatuekin erabaki behar zela erantzun zuen.

JUGOSLAVIA

UCK talde armatuko bi lekukogaz abiatu da Milosevicen epaiketa, berriz

Agentziak | DONOSTIA

Kosovo Askatzeko Armadako bi kide ohik emaniko testigantzarekin hasi zen atzo berriz Hagako Jugoslavia Ohirako Nazioarteko Zigor Auzitegian Slobodan Milosevic Jugoslaviako presidente ohiaren kontrako epaiketa, hilabetez saioak eten da izan ondoren.

Bere burua defendatzen ari den Milosevicek zorrotz galdekatu zituen UCK talde armatu albaniarreko kide ohiak. Serbiako Poliziak eta Jugoslaviako Armadak Kosovon eginikoa albaniarren «ekintza terroristen» aurkako borroka besterik ez zela izan esan zuen Milosevicek. «Haiena bai zen terrorismoa, eta ez guk egiten genuena», erantzun zuen Sadik Xhemajli UCK taldeko buru ohiak. Bi lekukoek esan zuten, Milosevicen gobernuak agindutako gehiegikeriak zirela eta herriarrak defendatzeko sortu zen.

Bestalde, Milosevicek «bihotzeko arazo larriak» pairatzen dituela zabaldu zuten duela hainbat aste auzitegiko sendagileek. «Akusatuaren osasunak epaiketaren abiadan eragitea litekeena da», esan zuen atzo Richard May epaileak.

TXEKIA

Kimika lantegi bateko burua kaleratu dute, isuri toxiko bat dela eta

Agentziak | DONOSTIA

Hil honetan izaniko uholdeetan ehunka kilo kimikagai pozoitsuak Elba ibaira bota zituen Spolana lantegiko zuzendaria kargutik kendu zuten atzo.

Dioxina eta merkurio gaiak isuri zituen, besteak beste, lantegiak duela bi aste eta ikertzaileek «Txernobil txikia» deitu duten hondamendia eragin. Inguruko zuhaitzak eta artasoroak erreta gelditu dira, eta baliteke urte luzetan ezin erabiltzea.